

科判	《佛說佛地經》	《佛地經論》	《佛說佛地經》 偈頌
佛地 (分五科)	爾時世尊告妙生菩薩。妙生當知。有五種法攝大覺地。何等為五。所謂清淨法界。大圓鏡智。平等性智。妙觀察智。成所作智。	<p>(卷三)淨法界者。即是真如無為功德。皆是真如體相差別。有為功德。四智所攝。無漏位中智用強故。以智名顯。一切種心心所有法。及彼品類。若就實義。一一智品具攝一切功德法門。若就麁相。妙觀察智攝四念住。觀察一切身等法故。平等性智攝四正斷及四無量。以四正斷雖用精進為其自性。而由如來平等性智所攝受故。無高下相。四無量者。平等行故。此智所攝。</p> <p>四如意足。以三摩地為自性故。觀察智攝。任持一切陀羅尼門。三摩地門。下經說故。如是其餘靜慮解脫等持等至。陀羅尼門三摩地門。無諍願智通無礙解。如來十八不共佛法力無畏等。多分攝在妙觀察智。</p> <p>神境智通多分攝在成所作智。</p> <p>漏盡智通漏盡智力。若說漏盡相續中有四智所攝。若說彼緣漏盡涅槃。多分攝在大圓鏡智平等性智。第七遍行行智力者。四智所攝。慧等諸根慧等諸力。多分攝在大圓鏡智平等性智。</p> <p>覺支道支多分攝在平等性智。</p> <p>苦等十智真無漏者。多分攝在大圓鏡智平等性智。</p> <p>無忘失法。多分攝在大圓鏡智。</p> <p>永斷一切習氣相續。多分攝在清淨法界大圓鏡智。</p> <p>波羅蜜多。若是無漏若似有漏。多分攝在後二智中。</p> <p>諸相隨好。多分攝在成所作智。其餘佛法。如其所應隨相應攝。如是四智具攝一切佛地。無漏心及心法。若俱有法。若所變現品類差別。清淨法界攝真如上諸相功德。是故五法具攝一切佛地功德。</p>	

甲一、清淨法界			
乙一、牒名	妙生當知。清淨法界者	謂清淨法界。廣說乃至成所作智。清淨法界者。謂離一切煩惱所知客塵障垢。一切有為無為等法無倒實性。一切聖法生長依因。一切如來真實自體。無始時來自性清淨。具足種種過十方界極微塵數性相功德。無生無滅猶如虛空。遍一切法一切有情。平等共有。與一切法不一不異。非有非無。離一切相一切分別一切名言。皆不能得。唯是清淨聖智所證。二空無我所顯真如。為其自性。諸聖分證諸佛圓證。如是名為清淨法界。	一切法真如， 二障清淨相。
乙二、釋難決擇法界差別(分十科)			
丙一、離差別過、得無差別相	譬如虛空。雖遍諸色種種相中。而不可說有種種相。體唯一味。如是如來清淨法界。雖復遍至種種相類所知境界。而不可說有種種相。體唯一味。	謂有難言。若諸如來法界為性。法界則用。真如為體。真如即是諸法共相。諸法既有種種差別。法界隨彼。云何無有種種差別。法界若有種種差別。云何清淨。非頗胝迦種種依止共相應故無種種相。為釋此難故說最初太虛空喻。 譬如虛空，雖遍諸色種種相中者。如世虛空雖遍一切有形礙色等不等類差別相中。品類差別故名種種。自體集在覺慧等上分明顯現。故名為相。即是行相而不可說有種種相者。而此虛空不可宣說有諸形礙種種色相。由此虛空其性自爾不應說故名不可說。或不能說名不可說。謂此虛空其性如是。不可宣說有其種種能表色相。亦不可說有其種種所表色相。	

而見虛空有種種相。及可說有種種相者。此見空中種種色相。非見虛空。及假說有種種色相。如青黃等。或長短等。非實是有。非假說有則有實事。

云何遍在一切色中。無種種相體唯一味者。非此虛空由與種種色相應故成種種相。不捨自性，體唯有一無障礙味。無異相故。如是如來清淨法界等者。如世虛空有體無體。雖遍一切形礙色中。而不隨成形礙差別。亦不可說有諸色相。雖亦說有唯假非實。由此虛空不捨自相取他相故。如雖假說虛空虛空而虛空性實不可說。清淨法界亦復如是。雖假說言真空真空。而真空性實不可說。由此虛空先所說因種種依止共相應故。

如頗胝迦。法界應有種種別者。有不定過。現見虛空。雖與種種色相相應。而無諸色種種相故。如烟霧等共相應故。有時見空有種種相。由自虛妄分別力故。但見烟等有種種相。非見虛空。以虛空性不可見故。如是由自虛妄分別增益力故。但見色等有種種相。非淨法界。

淨法界中雖無真實種種境界言說法教。而有種種境界法教差別相轉。非由彼有種種相故。亦令法界有種種相。

以淨法界離名言故。一切名言皆用分別所起為境。

然諸法教亦不唐捐。是證法界展轉因故。如見字書解所說義。由此法教是諸如來大悲所流。能展轉說離言說義。如以眾彩彩畫虛空甚為希有。若以言說說離言義。復過於彼。如說。海慧。譬如有人以種種色彩畫無色無見無對無表虛空。如牆壁等。甚為希有。諸佛世尊證得甚深離言說法。能以言說為諸有情補特伽羅。宣說開示復難於彼。如是廣說。又頗胝迦法界為性亦清淨故。非同法喻。所立因義。隨一不成或俱不成。

<p>丙二、離雜染過、得無雜染相</p>	<p>又如虛空雖遍諸色不相捨離。而不為彼過所染污。如是如來清淨法界。雖遍一切眾生心性。由真實故不相捨離。而不為彼過所染污。</p>	<p>復有難言。若淨法界遍在一切所知境界。亦與貪等諸煩惱垢共相應故。云何不如所餘有漏心心法品成不清淨。為釋此難故。說第二太虛空喻。又如虛空。</p> <p>雖遍諸色不相捨離者。無有別處。故名不相捨離。遍在內行不見出外故。既在內行不見出外。不可定言是一是異。若有別處。是則虛空應有形礙。應是無常。而不為色過所染污者。如太虛空雖遍一切形礙色內。而不為色過失所染。</p> <p>色過失者。謂是生長貪瞋等因。非青黃等種種異相。又於空中所有雲霧黑影色等。能令太虛捨淨相故。及能障礙淨見生故。名色過失。</p> <p>又於心上所增境相名色過失。為順他意故作前說。非太虛空為彼諸色過失所染。自性淨故。如是如來清淨法界雖遍一切眾生心性由真實故不相捨離者。如佛自心真實清淨。本性光潔本性淨故。一切眾生心性亦爾。本性真實本性清淨。心本性者。即是真如。一切眾生心平等性。如說由何說心平等。由空性故說心平等。如是廣說。</p> <p>心本性者。即心法性遍在一切眾生心性，是故說名心平等性。為辯如是心法性故。說由真實不相捨離。由是有情本淨心性。雖本性淨，復由今時客塵障垢新遠離故，安立如來其心清淨。</p> <p>又諸有情心平等性，即是真實，是圓成實自性攝故。由諸有情心平等性真實相故，表不捨離諸眾生心；</p> <p>又是心性真實相故，表不捨離一切有情心性而轉。此意說言。由遍轉故，不相捨離。</p>	
----------------------	---	---	--

而不為彼過所染污者，本性清淨故。過謂貪等。能令心相成過失故。成垢染故。雖為客塵分別所轉，非彼體故，不可全捨，可令清淨。依此密意說如是言，此心本性清淨。光潔心之法性，說名為心，非離心法性有異性淨心。

云何有情心有貪等？自分別力所任持故。心之顛倒未永斷故。此由無明力所起故。此義意言，譬如虛空本性雖淨，而為眩翳損肉眼故。顛倒相現似不清淨。如是法界本性雖淨。由自分別所起貪等眾因緣力。無明眩翳損慧眼故。顛倒相現似不清淨。若一切種清淨慧眼恒不見穢。

又淨法界若無差別。一切種淨，則名一切如來法身。亦名如來真實體性。於一切時常無變故。由此法界一切有情心相續中平等有故。說如是言，一切有情是如來藏，一切有情皆有佛性。為引不定種性有情，令心決定趣大乘故。

就有如來種性有情。說如是言，一切有情皆當作佛。

如有說言。一切無常一切皆苦。如是皆說少分一切，非全一切。若不爾者，便違所說五種種性，諸佛功德應當有盡。無所度故。則違所說。如來功德常無斷盡。不應無益。常住世間，本期度生，求佛果故。此淨法界雖遍一切平等皆有，而由自障力所持故。如世生盲不見日月。如有頌言。

眾生罪不現 如月於破器
遍滿諸世間 由法光如日

由此道理。如先所說。亦與貪等諸煩惱垢共相應故。如餘有漏心心法品。清淨法界成不淨者。有不定過。虛空雖與色垢相應。非不淨

		<p>故。心心法品雖與貪等煩惱相應。而用清淨法界為性。非不淨故。非同法喻。如說意樂不清淨者。見心不淨隨彼亦說法界不淨。由清淨相不顯現故。</p> <p>意樂淨者。見與貪等垢相應心本性清淨無垢穢故。法界常淨。彼所立因如前不成。由是法界遍一切故。譬如虛空。非諸有情過所染污。此說法界遍一切者。所執法空普皆有故。不待成立。</p>	
<p>丙三、離有行過、 得非有行相</p>	<p>又如虛空含容一切身語意業。而此虛空無有起作。如是如來清淨法界。含容一切智所變化利眾生事。清淨法界無有起作。</p>	<p>復有難言。若諸如來清淨法界真如為體。則無戲論亦無起作。云何得容利有情事因緣智生。若容智生則有起作。云何如來真如為相。為釋此難故。說第三太虛空喻。</p> <p>又如虛空含容一切身語意業者。如太虛空。雖無作意而能容受有情三業。身語二業有形礙故。可須容受。意業云何。非無形質。有對礙故。須他容受。即以此事名為容受。謂彼生時不為障礙。有對礙物亦以生時無障礙故。說言虛空之所容受。此法亦爾。生時無障而得生故。亦得說言虛空容受。</p> <p>又有對物無對礙時。容受餘物得往來故。依此法上假立虛空。意業亦爾。將欲滅時容受餘物。令得生起。何為不得。依此法上假立虛空。</p> <p>若異此者，實有虛空遍一切處。云何容受。若體實有不障礙故餘法得生名容受者。一切無色實有體法皆無障礙。並能容受應名虛空。餘處說言。唯色無故名虛空者。就世共知麤相而說。是故虛空容受三業亦無過失。</p> <p>而此虛空無有起作者，非此虛空如是分別。我容受此不容受彼。雖無作意而能容受。日月燈等所有光明亦復如是。雖無作意此彼分別。法爾生時能照諸色。如意寶珠亦復如是。雖無作意而能滿足眾生意願。所餘亦爾。且舉虛空類顯一切。如是如來清淨法界含容一</p>	

		<p>切智所變化利眾生事者。謂諸如來清淨法界任性而住。無有作意。安立一切利眾生事。一切智者。圓鏡智等。一切所變化者。身語意化。一切利眾生事者。謂能成辦一切有情勝利樂事。清淨法界皆能含容。彼法生時為助因故。</p> <p>清淨法界無有起作者。作意名起。能令其心捨餘境界趣餘緣故。心動名作。心慮動搖有所作故。謂淨法界雖無作意。心慮動搖而能容受諸智變化利有情事。</p> <p>復次含容一切智所變化利眾生事者。謂淨法界含容一切受用變化二身。所作利有情因無窮盡故。極廣大故。無對礙故。雖無分別，而增上力能生彼故。此總義言如虛空等容色生等作用轉時。雖無有我我所作意戲論分別。而法爾力廣作一切差別作用。</p> <p>如是如來住無漏界。雖無一切我我所等作意戲論種種分別。而先所修大願力故。能起一切智所變化利眾生事。</p> <p>如是如來第一難思安住法身。由先願力所任持故。一切相好功德莊嚴。窮生死際劫量相續。雖無分別。而作一切智所變化利眾生事。如來雖無如是分別。我於如是如是事業。當作不作。而本願力一切能作。如先發願。或入睡眠或入滅定。雖無作意隨所要期覺悟出定。</p> <p>如海慧經作如是說。如諸苾芻要期鐘聲而入滅定。不聞鐘聲亦無分別。由要期力應時出定。如是廣說。</p>	
<p>丙四、離有為過、得非有為相</p>	<p>又如空中種種色相現生現滅。而此虛空無生無滅。如是如來淨法界中。諸智</p>	<p>(卷四)復有難言。若淨法界遍在一切所知境界。不相捨離一向隨轉。是則法界應有生滅。若無生滅不應遍在所知境界不相捨離一向隨轉。為釋此難故。說第四太虛空喻。</p> <p>又如空中種種色相現生現滅等者。此義意言。如太虛空遍在諸色。容受色相不相捨離一向隨轉。諸色雖復現生現滅。而虛空性無生無</p>	

	變化利眾生事。現生現滅。而淨法界無生無滅。	滅。如是如來清淨法界遍一切境。含容一切智所變化利眾生事。不相捨離一向隨轉。智等雖有現生現滅。而淨法界無生無滅。就此密意。契經中說。曼殊室利不生不滅故名如來。乃至廣說。就勝義諦。色等諸法亦無生滅。就世俗諦。施設生滅。是故言現。此意說言。就世俗相現有生滅。非勝義體實有生滅。淨法界中諸智變化利眾生事。亦復如是。	
丙五、離增減過、得無增減相	又如空中種種色相現增現減。而此虛空無增無減。如是如來淨法界中。顯示如來甘露聖教有增有減。而淨法界無增無減。	復有難言。若淨法界遍在一切不相捨離。如來聖教現見有增後當減滅。法界同彼應有增減。若爾法界應不清淨。為釋此難故。說第五太虛空喻。又如空中種種色相現增現減等者。如來聖教於諸外道一切世間邪劣教中。最為真實殊勝清淨。猶如醍醐。亦如甘露。令得涅槃永不死故。如是聖教奉行證聖。得無學果。千載已前多分有故。說佛正法但經千載。非佛教法但住千歲。又聲聞藏雖佛去世百年已後。即分多部。而菩薩藏千載已前。清淨一味無有乖諍。千載已後乃興空有二種異論。是故說言。如來正法但經千載。而淨法界無增無減者。如來聖教就世俗理有增有減。非就勝義法界為性。無增減故。色等亦爾。法界為性無增無減。就勝義理猶如虛空。無增無減相。是故言現。謂就世俗識等變現似有增減。非就真性淨法界中。色等諸法皆離戲論分別相故。	
丙六、離行動過、得無行動相	又如空中十方色相無邊無盡。是虛空界無邊盡故。而此虛空無去無來無動無轉。如是如來淨法界中。建立十方一切眾生利益安	復有難言。若諸如來法界為體。如來施與一切有情利益安樂。或去或來。法界與彼不相離故。如所餘法應有去來應有生等。若爾，法界應不清淨。法界若無去來等事，不應十方施諸有情利益安樂。為釋此難故，說第六太虛空喻。又如空中十方色相無邊無盡等者。如虛空界無邊無盡。十方世界亦無邊盡是故其中種種色相。亦無邊盡。無一方邊無諸方盡。成就時	

	<p>樂。種種作用無邊無盡。清淨法界無邊盡故。而淨法界無去無來無動無轉。</p>	<p>處。是故說名無邊無盡。而此虛空無去無來無動無轉者，以太虛空含容一切遍一切故，無作用故。如是如來淨法界中。建立十方一切眾生等者，利樂作用無邊無盡。義如前說。清淨法界無邊盡故者。以淨法界無邊盡故。雖無行動，而增上力，能於十方無邊世界無邊有情利樂事轉。而淨法界無去無來等者。捨此就彼名去。捨彼就此名來。無動無轉。初標後釋。法界無者。無邊際故。無形礙故。若有邊際形礙諸法可說。異方去來動轉非無邊際形礙。法界如虛空等。得說去來動轉作業。此總義言。清淨法界是諸如來勝義自體。法界遍在一切有情相續中，有彼諸有情自善種子成熟力故，由淨法界增上緣力。彼識生時，如是作用變現，而轉說名如來作諸眾生利益安樂。除此作用增上緣力，更無如來法身能作有情利益安樂事用。如契經言。善男子。如來都無去來等事。而言如來去來等者，就受用身及變化身。無相違過。</p>	
<p>丙七、離斷常過、得非斷常相</p>	<p>又如空中三千世界現壞現成。而虛空界無壞無成。如是如來淨法界中。現無量相成等正覺。或復示現入大涅槃。而淨法界非成等覺。非入寂滅。</p>	<p>復有難言。若淨法界離去來等。云何無有方所去來。而得正覺般涅槃等。若有去來，還得前過。為釋此難故。說第七太虛空喻。又如空中三千世界等者。此難不然。譬如世界現壞現成。而虛空界無成壞故。淨法界中，雖有諸佛現成正覺般涅槃等，而淨法界真實無有成等正覺涅槃等事。若有此事，可為此故有去來等。如虛空中現諸世界滅壞生成。就世俗理非真實義。彼如太虛皆性空故。如是如來清淨法界，現無量相成等正覺、或復涅槃。亦由世俗，非真實義。成正覺者、入涅槃者，皆無有故。緣生諸蘊，非我性故。</p>	

		<p>若淨法界，就真實義。有此二者，應非真實。以真實法不捨自相，取餘相故。若許法界捨非正覺成等正覺。捨非涅槃得般涅槃。則非真實。若有，意謂。即以此義名為真實等正覺者，曾無有時不等正覺般涅槃者，曾無有時不般涅槃。是故真實。</p> <p>若爾，餘事亦應如是。壞劫恒壞無時不壞。成劫恒成無時不成。瓶等無時不是瓶等。如是等事皆應真實。若爾，不應修觀行者度熾火等遍滿世界往餘世界，應被其中火所燒等。獲得增上勝解力者，於其地等，應無自在轉變作用。</p> <p>非得勝定自在力者。現等正覺非等正覺。現般涅槃非般涅槃。是故雖有先正覺位，今涅槃位。而淨真如不捨自相故。淨法界非成等覺。非入涅槃。此中二種，皆是增益為自相故，非真實有。作者作用，皆是遍計所執相故俱無所有。</p> <p>而言隨覺一切法故名菩提者，此是出世無分別智，成等正覺。此中亦以緣真如智二種分別。不現行故，非等正覺非般涅槃。即依如是密意說言。天子當知。以一切法皆無生故。諸佛現生無得、無證。乃至廣說。遍計所執無所有故，生等分別亦無有故。由世俗理施設二故。由變化身示現二故。隨順所化有情意故。如來示現如是二事。且舉二事，類顯一切。</p>	
<p>丙八、離勞弊過、得無勞弊相</p>	<p>又如依空種種色相壞爛燒燥變異可得。而虛空界非彼所變。亦無勞弊。如是依止如來淨界。眾生界內種種學處身語意業毀犯可</p>	<p>復有難言。若淨法界遍在一切有情之類。云何有情得有毀犯。非法界中有諸毀犯。性清淨故。制立學處亦應唐捐。以諸有情無毀犯故。若有毀犯應有勞弊。應同二乘非極清淨。為釋此難故。說第八太虛空喻。</p> <p>又如依空種種色相等者。此難不然。如虛空故。譬如依空諸草木等。種種色相壞等變異種種可得。而淨虛空不為彼物之所變異。雖在其中而無變異。亦無勞弊。無有壞等苦所逼故。</p>	

	<p>得。而淨法界非彼變異。亦無勞弊。</p>	<p>如是依止如來淨界眾生界內。雖有種種毀犯可得。而淨法界無有變異。亦無勞弊。</p> <p>雖淨界中現見有情自分別起身語意業二種毀犯。謂在家者害父母等。種種不善毀犯可得。諸出家者隨其所應。亦有種種毀犯可得。及為遮止制立種種學處可得。此皆世俗有所違犯。而淨法界非彼違犯之所變異。無異性故。亦無勞弊。無逼切故。</p> <p>若為苦逼不堪耐故。則有勞弊。如聲聞等非淨法界。不能堪耐一切苦逼。故無勞弊。猶如虛空。</p> <p>又如空中色等諸法。雖有壞等。但是世俗而非真實。如是如來淨法界中。雖有毀犯制立學處。但假安立而非實有。所以者何。身等三業不善等性。皆由相應發起勢力。假名建立。不由自性。非塊石等由發起力可實建立為不善等，身業亦爾。地等和合所成性故。語業亦如鍾鼓聲等。</p> <p>非不善等諸無表業。唯以不作為其性故。亦非實有。意業亦由相應勢力立不善等。如餘相應亦非實有。因既非實，果亦應爾。故法界中若業若果。一切皆是分別所起。世俗識等變現而生。如變現相。如是建立皆非真實。</p>	
<p>丙九、離積聚過、 得非積聚相</p>	<p>又如依空大地大山光明水火帝釋眷屬。乃至日月。種種可得。而虛空界非彼諸相。如是依止如來淨界。戒蘊定蘊慧蘊解脫解脫智見諸蘊可得。而淨法界非彼諸相。</p>	<p>復有難言。若淨法界遍一切法。應無戒等無漏蘊相。不相離故。應如法界。亦非蘊性。為釋此難故。說第九太虛空喻。</p> <p>又如依空大地大山光明水火等者。此難不然。如虛空故。</p> <p>譬如依空，地等可得。非與地等共相應故。空成蘊性。如是依止如來淨界。雖有戒等諸蘊可得。而淨法界非戒等蘊。當知此中無漏淨戒，名為戒蘊。無漏定慧，名定慧蘊。無學勝解，名解脫蘊。無學正見，名解脫智見蘊。前三是因，後二是果。</p> <p>有義。一切皆是無學緣解脫慧名解脫智見。餘慧名慧。</p>	

		<p>有義。一切通學無學。學位分得。無學圓滿。諸佛菩薩皆具五故。如是五蘊，雖依法界，而淨法界不同彼相。彼亦不失五蘊自相。此中亦應說五取蘊。戒等無漏，同法界故。</p> <p>且略宣說淨法界中。雖無戒等諸事功德。而有真理功德法門。彼增上緣，生長一切有為功德，不同虛空。法界真理功德法門，是無為故，非蘊所攝。依之，生長一切功德。有為生滅，是蘊所攝。無斷盡故，亦說名常。非永不滅，生必歸滅，一向記故。蘊所攝故，非無為法，有緣慮等作用義故。以其勝故，且說五蘊法界實是一切三乘功德所依。</p>	
<p>丙十、離攝眾過、得無我所相</p>	<p>又如空中種種因緣展轉生起。三千大千無量世界周輪可得。而虛空界無所起作。如是如來淨法界中具無量相。諸佛眾會周輪可得。而淨法界無所起作。</p>	<p>復有難言。若一切佛法界為體。應無彼此受用差別。云何得有眾會不同。若所受用有差別者。云何諸佛法界清淨。為釋此難故。說第十太虛空喻。</p> <p>又如空中種種因緣展轉生起等者。此難不然。如虛空故。如虛空中。因緣生起。三千界等周匝風輪圍遶可得。虛空雖無我所差別分別思慮。而能容受種種差別世界周輪。如是如來淨法界中自業增上所起。種種眾相圓滿得一切智。灌頂菩薩同一集會周輪可得。別別因緣之所生起。非如一佛眾會因緣。第二第三亦復如是。餘契經中依此故。說諸佛淨土種種可得。諸佛眾會種種可得。而淨法界無我我所受用差別。及以造作能取所取分別可得。</p> <p>此總義言。如來法身雖無差別戲論色像。而受用身及變化身。由本願力自勝行力。生起種種眾相圓滿諸佛淨土。諸佛眾會差別可得。皆是淨識如是變現。種種差別非真實有。如轉輪王由宿願力。亦為饒益諸有情故。造作勝行。生女寶等諸妙樂具種種差別。</p>	

		諸佛亦爾。為欲饒益諸有情故造作勝行。自業增上生起種種淨國。眾會受用法樂眾具差別。但無分別與前有異。	
甲二、大圓鏡智 (分二科)			
乙一、牒名	復次妙生。 大圓鏡智者		法智彼所緣， 自在無盡相。
乙二、相勝餘三智(分九科)			
丙一、訓詞相	如依圓鏡眾像影現。如是依止如來智鏡。諸處境識眾像影現。唯以圓鏡為譬喻者。當知圓鏡如來智鏡平等平等。是故智鏡名圓鏡智。	應知。此中以喻顯示大圓鏡智。是能生現諸法影像平等因緣。謂諸如來第八淨識。能現能生智等影像。如大圓鏡能現世間一切影像。智相應故。假說名智。言諸處者。謂內六處。即是眼等。言諸境者。謂外六境。即是色等。此內六處外六境界。即十二處。緣此十二生三智品心及心法。識為主故總名諸識。即此諸識名眾像影。種種行相差別現故。此後經言。大圓鏡智於一切時依諸緣故。種種智影相貌生起。如是等文皆說。能為智影生因故名鏡智。平等性智以緣生事圓鏡智等為境界故。妙觀察智以一切法自相共相為境界故。成所作智應知亦爾。如是三智相應心品。於內六處外六境界。一切所緣所取境上。變似一切自相共相。種種影像分明顯現。如是影像皆因如來大圓鏡智而得生起。分明顯了故名為現。此唯如來智等所現。如來果位，平等智等為自性故。智等生時如自所有行相差別皆能證知。唯有如來覺慧。分析	

說示其相。餘無此能。大圓鏡智說名能現。由此為緣生彼影像。猶如明鏡現諸影故。

又處境識三事各別。處謂六根。境謂六塵。識謂六識。即十八界眾像影現。此眾像影隨其所應三智品現。

觀察智等盡所有性。如所有性皆能現故。

如來鏡智相應淨識為緣。生此三智影像故名為現。亦唯如來智等所現。廣說乃至唯有如來覺慧。分析說示其相。餘如前說。

又十八界皆在如來大圓鏡智相應心品影像顯現。以諸如來鏡智生時。皆能照了一切境故。諸處境識猶如影像。在此智中分明顯現。由此鏡智攝受彼相。而生起故。鏡智雖無所取能取一異分別。而有一切所知影現。如大圓鏡。此智生時如是行相為自性故。如來雖無所取能取一異分別。而能現證自心所現。自相共相諸法影像。由證知故。能無顛倒說一切法自相共相。由此影像，如來成就無忘失法。一切所知境界影像。於一切時鏡智等上分明顯現。無忘失故。若不爾者。云何如來名一切智。無鏡智等不能恒時於一切法自相共相現證知故。若謂相續有堪能故名一切智。如有頌曰。

相續有堪能 如火食一切
如是一切智 非頓知一切

此但虛言。他心智等取一事時。不取餘事不知餘故。非一切智。就其相續亦不能取知現在故。汝宗一念但知一分諸法共相。若爾，如來應假名說為一切智。不可假說非一切智。為一切智即成真實一切智者。

又以如來鏡智為緣。餘相續中世出世善諸處境識眾像影現。以諸世間世出世善。若無鏡智皆不得生。彼法生時皆由此力。亦能證知。此義意言。如來鏡智增上緣力。一切世間世出世善。諸處境識皆得生起。如明鏡中眾像影現。雖諸有情各有因力。而由鏡智為增上緣乃得生起。如雖有種若無地等芽等不生。如雖有質若無鏡等眾影不現。若爾，世尊應同妄見。自在天等為世間因。立為世間一切果生，平等因故。無此過失。以彼生時，唯能為作增上緣故。非作者故。是無常故。於無量劫修集福智二種資糧。所生起故。一切眾生善及善緣。由此得生。外道妄見自在天等。與諸世間為能作者。其性常住故不相似。

若無實影，圓鏡中生云何為喻。有質有鏡和合為緣。如是相現故得為喻。謂諸有情顛倒執著影像。熏習成熟力故。鏡面為緣，自識變異似面影現。由是世間起增上慢。謂我鏡中見其面影。以無別影鏡中生故。經但說言眾像影現。不言生起。如是應知。一切境相皆是自識變異顯現，非別實有。以識勝故。但言唯識。非無心法。亦不說言唯有一識。以諸有情各有八識及心法故。一切色等雖各有種。皆是自識變異熏習識上。功能差別為性故。

變現時還不離識。就世俗說別有心法。非真實義。以就勝義諸法皆無定別性故。乃至真如雖非識變。亦不離識。識實性故。識上二空無我共相所顯示故。

此唯識言。但遮愚夫橫計一切心心法外定性色等遍計所執。不遣不離諸心心法色等諸法。依他起性圓成實性。非無有故。由平等故。此二平等。是故說言平等平等。世間圓鏡、如來智鏡俱無分別。皆能現影無有差別。由是因緣名圓鏡智。

<p>丙二、無分別相</p>	<p>如大圓鏡有樂福人懸高勝處無所動搖。諸有去來無量眾生。於此觀察自身得失。為欲存得捨諸失故。如是如來懸圓鏡智處淨法界無間斷故。無所動搖。欲令無量無數眾生觀於染淨。為欲取淨捨諸染故。</p>	<p>高勝處者所謂高幢。或餘勝處。淨法界者。無垢真如。處謂安處。或依或緣無間斷故。無動搖者。由此鏡智依緣法界窮生死際。恒常隨逐相續無斷故。無動搖。此義意言。大圓鏡智永離一切分別動搖。一得已後盡未來際。相續無斷。其餘三智雖無妄計。而有無執作意分別。證得已後或行不行。非不動搖。有義。滅定平等性智亦不現行。論說滅定無第七故。又說亦滅一分恒行心心法故。若爾，論說於三位中皆無第七。是則初地已上無漏現觀行時。及如來地應無此智。即為大失。違經論故。然說無者意。說無有染污第七。非一切無。未得法空無我智來。法分別執常現依故。如未證得補特伽羅空無我智。彼執恒行。依此識故。決擇分說阿賴耶識。定與末那一識俱轉。若起意識定與二識一時俱轉。若五識中隨起一識。定與三識一時俱轉。乃至一時若起五識。定與七識一時俱轉故。知聖道滅定無學亦有。無染法分別執平等智俱第七識等行相細故。不違滅定。由此滅定是無漏道所引發故。體無漏故。與染污意我執相違。此一分滅，非滅一切故平等智於佛果上。雖恒現行。而十地中證得已後。或起煩惱有漏心時。此智不起。有間斷故。非不動搖。其餘二智於佛果上。亦不常行故。非不動搖。何故安處大圓鏡智。在淨法界。為令無量無數眾生觀染淨故。何故觀彼為欲取淨捨諸染故。染謂煩惱及業生相。捨謂伏斷。由世間道及出世道。暫時畢竟伏斷彼故。淨謂諸善能令眾生心清淨故。取謂任持。安立長養成熟種子。隨所願求證解脫故。此中意說。一切如來昔菩薩位。為欲成辦一切有情一切種相利樂事故。一切有情利益安樂意樂。常隨依淨法界。隨所</p>	
----------------	---	---	--

		<p>修集福智資糧迴求相續。大圓鏡智方便善巧勤修習故。證得此智依緣法界相續無動。雖無作意分別戲論。而相續轉為增上緣。令諸有情隨所求願。安立長養成熟無量善根種子。得世間樂出世解脫。此由如來大圓鏡智起。化生用為諸有情宣說法要。令知染淨，取淨捨染。即是利樂有情根本。</p>	
<p>丙三、障清淨相</p>	<p>又如圓鏡極善摩瑩。鑒淨無垢光明遍照。如是如來大圓鏡智。於佛智上一切煩惱所知障垢。永出離故。極善摩瑩為依止。定所攝持故。鑒淨無垢作諸眾生利樂事故。光明遍照。</p>	<p>鑒謂自性極清淨故。淨謂差別離客塵故。言無垢者。總前二種周圓離垢極清淨故。光者由鑒。明者由淨。言遍照者。由無垢故。於佛智上等者。即煩惱障及所知障。俱名為垢。究竟斷故名永出離。由有永出諸障垢義故。說鏡智極善摩瑩。</p> <p>又煩惱者。謂貪瞋等一切煩惱纏隨眠位。若行不行皆有勢力。障生聖道。障得涅槃。亂身心故名煩惱障。所知障者。於所知境不染無知，障一切智。不障涅槃。雖有此障。見聲聞等得涅槃故。即此二障亦名為垢礙。清淨智令不生故。染淨智故。由得對治客塵障垢。畢竟不生名永出離。由永離障大圓鏡智恆時極淨。是故說為極善摩瑩。</p> <p>為依止定所攝持故者。是所依止故名依止。大圓鏡智依此生故。依止即定名依止。定或智依。定名依止。定從此無間解脫道生。極清淨故。此所依定。即是殊勝金剛喻定。由彼定力障永斷故。此智為彼所依止。定力所攝持故名攝持。彼定無間，此智生故。由彼定力最極清淨。離諸分別無有分別。鏡智生故。</p> <p>此智既為所依止定所攝持故。鑒淨無垢自體清淨故。名為鑒。離煩惱障故名淨。離所知障故名無垢。</p> <p>作諸眾生利樂事故，光明遍照者。此智為定所攝持故。亦能起作一切有情諸利樂事。由作此故光明遍照。自性清淨鑒故名光。離煩惱障及所知障。如其次第名明遍照。</p>	

		此中意說。如大圓鏡極善摩瑩鑿淨無垢。為令他見面之得失。為饒益事。是故說名光明遍照。大圓鏡智自性清淨。遠離二障鑿淨無垢。雖不可見而起受用及變化身。能生諸智成辦眾生諸饒益事。是故說名光明遍照。	
丙四、依止因緣生智影相	又如圓鏡依緣本質。種種影像相貌生起。如是如來大圓鏡智。於一切時依諸緣故。種種智影相貌生起。	<p>若圓鏡智是諸有情一切智等影像生因。云何影像相有差別。云何此智體無差別。</p> <p>又一切時常能為因。何不恒時頓生。一切眾生及自智等影像。釋此難言。又如圓鏡依緣本質種種影像相貌生起。非影異故鏡體差別。亦非恒時頓生影像。待眾緣故。如是鏡智於一切時待眾緣故。生智等影種種差別。非彼異故智成。青等種種體別。亦非恒時頓生一切眾生及自聖智等影。待時待緣乃能生故。此中意說。大圓鏡智相應淨識有二種用。</p> <p>一因緣用。謂淨識中具有一切能現能生身土境智淨法種子。若遇外緣。即便變現身土境界種種影像。及能生起平等智等相應心品行相差別。</p> <p>二增上緣用。謂佛淨識善根願力所生起故。若諸眾生自因緣具。爾時淨識即便資助。令得無障生長成滿。是故鏡智體雖是一。能現能生諸法影像。待外緣故非頓現起。</p>	
丙五、無有我無攝受相	如圓鏡上非一眾多諸影像起。而圓鏡上無諸影像。而此圓鏡無動無作。如是如來圓鏡智上。非一眾多諸智影起。圓鏡智上無諸	若諸智影於鏡智上，先已有體。云何鏡智為緣而生。若先無體。云何能生諸智影像。而無動作。不見陶師無有動作。而能生起，先無瓶等。釋此難言。如圓鏡上非一眾多諸影像等。如大圓鏡能起諸影。同類數多故名非一。異類無數故名眾多。觀待同類簡一種故說言非一。觀待異類顯無數故說言眾多。如是鏡上雖先無影而起多影。而無思慮分別動作。鏡智亦爾。雖先無有智等影像。而能生起	

	<p>智影。而此智鏡無動無作。</p>	<p>智等種種諸法影像。觀待同類說言非一。觀待異類說言眾多。雖生如是智等影像。而無思慮分別動作。此中意言。如大圓鏡雖無分別。而能生起種種影像。鏡智亦爾。雖無我執及我所執。所取能取作意分別。而能生起種種智等諸法影像</p>	
<p>丙六、不忘一切所知境相</p>	<p>又如圓鏡與眾影像非合非離。不聚集故。現彼緣故。如是如來大圓鏡智。與眾智影非合非離。不聚集故。不散失故。</p>	<p>若圓鏡智與諸智等影像和合。云何不由彼差別故。此成差別。若不和合云何為因。不見種等與諸芽等果不和合。而能為因。非日光等與石灰等。不共和合而相顯照。釋此難言。又如圓鏡與眾影像非合離等。如世圓鏡，雖能為因起眾影像。而不與彼影像和合。彼未生前由未有體不聚集故。非此與彼或俱不俱。可名和合。圓鏡與影亦非別離。現彼緣故。即由此義非不和合。要由此有彼得有故。雖與影像為現生因。而非影像有差別故。鏡成差別。大圓鏡智亦復如是。雖能為因生智等影。而與智等非合非離。不聚集故。不散失故。</p> <p>言非合者。彼未生前由未有體。不聚集故。</p> <p>言非離者。要有鏡智智等影生。無則不生。</p> <p>不散失故。離壞無有名為散失。與彼相違名不散失。攝生彼故，或不忘失。所緣境相名不散失。由鏡智中顯現一切所知相故。三世智等及諸眾生。若不遍知，鏡智不生。要知一切，此智乃生。是故此智不忘一切所緣境相。名不散失。不散失故。所以非離。</p> <p>雖能為因起智等影。而不由彼有差別故此成差別。如大圓鏡無差別轉。此中意說。如世圓鏡雖能為因起諸影像。而非合離差別所觸。鏡智亦爾。雖能為因起智等影。而非合離差別所觸。種等雖能為芽等因。而亦合離俱不可說。光明細分亦非色等。共相和合以俱有故。令其識上似與色等和合相生。以世現見一切因果。雖非合離，而能為因。是故無有因果二相決定和合。</p>	

<p>丙七、遍處恒時生智影相</p>	<p>又如圓鏡周瑩其面。於一切處為諸影像遍起依緣。如是如來大圓鏡。智不斷無量眾行善瑩。為諸智影遍起依緣。謂聲聞乘諸智影像。獨一覺乘諸智影像。無上大乘諸智影像。為欲令諸聲聞乘人。依聲聞乘而出離故。獨一覺人依獨覺乘而出離故。大乘之人依無上乘而出離故。</p>	<p>(卷五)云何一智於一切時，能生三乘一切智等諸法影像？釋此難言。又如圓鏡周瑩面等。如世圓鏡為遍於中現其面等一切影像。種種加行周瑩其面，前後兩邊。於一切處普能為緣現一切影。鏡智亦爾，一切如來為菩薩時。雖有種性而為障覆。未能現起為遍於中生起三乘一切智等諸法影故。精勤修習不斷無量眾行善瑩。金剛喻定現在前時，離一切障清淨圓滿。遍能生起三乘智等。一切影像不斷。就方無分限故。無量就時無量時故。此言因位遍一切處。於無量時勤修眾行。除障善瑩大圓鏡智，能生三乘智等影像。又即鏡智遍處，恒時離諸垢穢。種種行德圓滿。莊嚴極圓淨故。一切處時，能起諸影。如說殊勝金剛喻定斷一切障。證得如來大圓鏡智。種種功德圓滿莊嚴於一切處。及無量時能起三乘一切影像。此中意說。各別善根成熟差別，勝道生時。大圓鏡智或近或遠。隨其所應，為作強緣。決定種性，各依自乘。而得出離。不定種性或依大乘。或依餘乘而得出離。言出離者。即是涅槃。諸三乘人用自種性以為因緣。如來鏡智為增上緣。精勤方便修集資糧引生聖道。除煩惱障及所知障。隨其所應各證涅槃。決定種性聲聞獨覺住無學位。樂寂滅故。發業潤生諸煩惱障永滅除故。先業煩惱所感身心任運滅已。更不受生無所依故。一切有漏無漏有為諸行種子。皆隨斷滅。唯有轉依無戲論相。離垢真如清淨法界解脫身在。名無餘依般涅槃界。常住安樂究竟寂滅。不墮眾數不可思議。同諸如來。但無有為無漏功德所莊嚴故，無有更起利益安樂有情事故。不同如來。</p>	
--------------------	---	--	--

		<p>不定種性聲聞獨覺住無學位，雖無煩惱樂菩提故。由定願力，留身相續，修大乘行。乃至獲得金剛喻定。一切障滅證佛三身。雖有有為無漏功德。而無有漏身心在故。證無餘依大涅槃界。依謂三界有漏身心。</p> <p>若諸菩薩斷二障盡得佛果時。即得說名證無餘依大涅槃界。是故二乘先入有餘依涅槃界。後入無餘依涅槃界。</p> <p>菩薩初證如來地時。頓證二種大涅槃界。一切有漏身心盡故。名無餘依。猶有變化似有漏相身心在故。名有餘依。悲智無斷所證得故。亦名無住大涅槃界。</p> <p>涅槃，即是真如體上障永滅義。由無漏慧簡擇諦理。斷諸雜染而證得故。亦名擇滅。如是擇滅於真如上假施設有。無別實物，至究竟位，說名涅槃。</p> <p>無所趣故。無臭穢故。離編織故。離稠林故。名為涅槃。</p> <p>聲聞獨覺有所知障習氣未滅。云何證得究竟涅槃？所知障習是無知故。非染污故。障菩提果不障涅槃。非煩惱故。不能潤生。若無願力。迴心趣大至無學位。盡其壽量必永寂滅。</p>	
<p>丙八、能生一切智根本相</p>	<p>如圓鏡中大影可得。所謂大地大山大樹大宮舍影。而是圓鏡不等彼量。如是如來圓鏡智上。從極喜地乃至佛地智影可得。及與一切世出世法智影可得。而圓鏡智非彼分量。</p>	<p>若圓鏡智能起智影。應同彼量差別可得。釋此難言。如圓鏡中大影可得。謂大地等，如世圓鏡。雖能為緣起地等影。而是圓鏡不等彼量。一小鏡中眾多山等大影可得。一大鏡中眾多石等小影可得。雖有形礙而不同影大小數量。鏡智亦爾。雖起諸地世出世間諸智影像，無形礙故。而不同彼一切智影大小數量。由是因緣，諸佛鏡智名大智藏。世出世間智根本故。如說世尊成大智藏鏡智。能生一切智故。應知此中以智名說一切功德。</p> <p>由是鏡智相應淨識。具足一切自利利他功德種子。能為因緣，生自身中智等影像。為增上緣，生他身中智等影像。</p>	

		由此鏡智。能變現身生智說法。展轉生他智等影故。或悲願力熏修所成。任運為他智等善法增上緣故。令他身中智等善法易得生長。是故經言。一切眾生所有善法。及殊勝果。皆是如來慈悲願力增上所起。	
丙九、於非法器不能生相(分三科)			
丁一、親近不善知識聞不正法，暫時有障非聖法器	又如圓鏡非處障質影像起緣。如是如來大圓鏡智非惡友攝聞不正法。障礙眾生智影起緣。彼非器故。	若圓鏡智為令三乘得出離故。生諸智影。又悲願力熏修所成為增上緣。生世出世諸智影者。云何世間諸外道等正智不生。能生因緣常和合故。諸外道等應無顛倒？釋此難言。又如圓鏡非處障質影像緣等。如世圓鏡雖能為緣現諸影像。而非處在壁障等質影像起緣。如來鏡智亦復如是。雖能為緣生智影像。而非處在惡知識攝愛。樂聽聞邪法障者。智影生緣，以彼非是可加被器聞正法器。是故外道聖道不生，常懷顛倒。善法種子被損伏故。惡法種子遇生緣故。一切眾生無始時來。習善時少，造惡時多。是故善法雖遇強緣亦難生長。惡法雖遇少小外緣則便熾盛。	
丁二、煩惱癡障所障非聖法器	又如圓鏡非處闇質影像起緣。如是如來大圓鏡智。非處樂惡愚昧眾生智影起緣。彼非器故。	如外緣障，智影不生。如是內緣宿習樂惡。無明闇障，智影不起。諸樂惡者，雖貪瞋等一切煩惱悉皆熾盛。而癡偏重。以不了知善惡因果勝劣事故。世間現有諸佛正法。利益安樂一切眾生。三寶良田，生長一切世出世間無量福聚。不欲聽受、不樂歸依。而反聽受無利無樂外道邪法。歸依生長能感眾苦。無量惡業、種種邪神。豈非無明癡闇障力。是故障善，無明最重。當勤修習智慧光明。無明重者，非善器故。	

<p>丁三、極重業障所障及無出世聖道種子，久時畢竟非聖法器</p>	<p>又如圓鏡非處遠質影像起緣。如是如來大圓鏡智。非處不淨感匱法業。不信眾生智影起緣。彼非器故。</p>	<p>如是內外二緣障力，智影不生。 一、由先世感匱法業。令於多時不聞正法。謂於前生誹毀正法。由此業障，經無量劫不聞佛法。即此不聞諸佛正法。是彼業果，障彼智影令不得生，不聞正法。其體是無云何得名？謗正法果，云何能障可生智影。不即說彼不聞正法為果為障。然說由彼感匱法業所得。不能聽受正法。不具根等，愚鈍身心為果為障。 二、由不信。謂無種性、無涅槃法。不樂涅槃。無有出世聖道種子。於證真如有畢竟障。聞出世法都不信受。畢竟不得三乘涅槃。如是一切身心相續不清淨故。非聖法器。暫時畢竟不生出世功德智影。如濁穢水不能發生月等影像。鏡智亦爾。於彼不能生智影像。</p>	
<p>甲三、平等性智 (分二科)</p>			
<p>乙一、牒名</p>	<p>復次妙生，平等性智者。由十種相圓滿成就。</p>	<p>平等性智由十種相圓滿成就。應知即是十地修果。一一地中略說。各證一平等性。修習圓滿成就佛地平等性智。是故說言。平等性智由十種相圓滿成就。若廣說者。一一地中各證無量平等法性。修習圓滿成就佛地平等性智。</p>	<p>普遍真如智，修習證圓滿。</p>
<p>乙二、十相圓滿成就(分十科)</p>			
<p>丙一、證得諸相增上喜愛平等法性</p>	<p>證得諸相、增上、喜愛平等法性圓滿成故。</p>	<p>諸相者。謂諸大士相及諸隨好相差別故。皆名為相。如是諸相遠離遍計所執自性。說名平等故。契經言。諸大士相，如來即說以為非相。是故說名諸大士相。 增上者。謂富貴自在。</p>	

		<p>色等諸蘊各別。皆非富貴自在。和合亦非富貴自在。即別性故。諸法合時不捨自性。離此無實補特伽羅。是故一切富貴自在。遠離遍計所執自性。說名平等故。契經言。世尊我今解了。一切以無我故無貧無富。</p> <p>喜愛者。謂所有喜愛由遍計力。於順彼法發生歡喜。於違彼法發生憂感。遍計所執諸法無故。於彼一切遍計所執喜愛亦無。說名平等。</p> <p>達解如是所說諸相增上喜愛平等法性故。名證得初地。菩薩最初證得。後後地中漸漸方便修令增長。最後佛地圓滿成就。從此已後更無增長。由此證得圓滿成故。平等性智圓滿成就應知。此中圓滿成故。於第三處說第五轉。一切應說由圓滿成。義類相似言詞便故作如是說。</p>	
<p>丙二、證得一切領受緣起平等法性</p>	<p>證得一切領受緣起平等法性圓滿成故。</p>	<p>緣起有二。謂內及外。內緣起者。謂無明等十二有支。外緣起者。謂種芽等一切外物。</p> <p>內者應以雜染清淨二分行相順逆觀察。</p> <p>外者應以此有故彼有此生故彼生行相觀察。謂種等有故種等生故。芽等得有芽等得生。此二緣起一切皆由因有故果有。因生故果生。無作用義是緣起義。空無我義。無補特伽羅義是緣起義。如是等義緣起自相。是所領受故名領受。</p> <p>或假有情能領受故。名為領受。緣起諸法是所領受。如是一切領受緣起。無作用故。空無我故。無補特伽羅故。遠離遍計所執自性。說名平等達解。如是所說一切領受緣起平等法性故名證得。由此證得，如前修習圓滿成故。平等性智圓滿成就。如是緣起平等法性。即一切法平等法性。</p>	

		如說梵志！一切法性即是緣生緣起法性。悟解此故名為菩提。如佛所見。一切法性如此即是緣起法性。又契經言。不見少法離緣起性。此中緣起平等法性，名緣起性。依此密意說如是言。若見緣起即見法性。若見法性即見諸佛。緣起實性即勝義法、勝義佛故。平等法性於一切處。皆無差別，故作是說。	
丙三、證得遠離異相、非相平等法性	證得遠離異相非相平等法性圓滿成故。	色等諸法變壞等相不相似故。名為異相。遠離如是各別異相。即是共相。如是共相以何為相？非相為相。 如契經言。一切法性唯有一相。所謂非相。非相即是平等法性。達解如是遍計所執。一切法性畢竟永無，平等法性故名證得。由此證得如前修習圓滿成故。平等性智圓滿成就。 復有義者。遠離異相即無有相。遠離非相即無無相。無有、無無名平等性。餘如前說。	
丙四、弘濟大慈平等法性	弘濟大慈平等法性圓滿成故。	慈有三種。一有情緣。二者法緣。三者無緣。 初發心位諸菩薩等。多分修習有情緣慈。多是有漏。以世俗有為境界故。 修正行位諸菩薩等。多分修習法緣之慈。亦多有漏大乘教法為境界故。 得無生忍諸菩薩等。多分修習無緣之慈。雖有所緣法界故。譬如眼等異熟諸法，無有分別。不作加行任運轉故，說名無緣平等性智相應大慈。 或有義者。唯緣法界，所緣分別永無有故。不緣有情及諸法故。名無緣慈。 復有義者。亦緣諸法。如實義者。亦緣有情但無分別。平等行相了知一切假立。有情性平等故。緣生等法性平等故。無我真如性平等	

		<p>故。名平等智。此智相應就所緣境得具三慈。但無分別，平等行故。說名無緣。</p> <p>如來地中平等性智相應大慈。眾相成滿，恒常現行。如來既有無緣大慈。餘二不說自然成就。如來由此三種慈故。平等救濟一切有情。非但於彼少分與樂。普於一切有情諸法無我真如平等性轉。恒常現行救度一切故名大慈。非如聲聞及異生等。暫時少分與樂行轉。不能救度一切有情。以勝一切聲聞等故。救度一切諸有情故。長時積集福慧資糧所成滿故。說名弘濟。</p> <p>如是所說弘濟大慈遍一切處。無差別轉故名平等。即此平等說名法性。或即所說弘濟大慈平等法性為所緣故。就境說名平等法性。由此大慈如前修習圓滿成故。平等性智圓滿成就。</p>	
<p>丙五、無待大悲平等法性</p>	<p>無待大悲平等法性圓滿成故。</p>	<p>聲聞等悲不能拔濟一切有情。唯緣欲界少分行相，暫時而轉。如來大悲普能拔濟一切有情。通緣三界遍滿行相，恒時而轉。</p> <p>言無待者。無所觀待恒救不捨。謂無所待，隨其所應拔濟三苦。所苦有情恒轉不捨。猶如長者怜愛一子。於諸有情平等而轉。以有情界無邊際故。成熟有情時無暫廢。成熟有情曾不過時。如來常與大悲相應。不可說言暫起暫轉。</p> <p>如經言。善男子。不應說言諸佛世尊所有大悲。於諸有情暫起暫轉。何以故恒常轉故。諸佛世尊乃至大悲無根未立。終不證得無上菩提。如來證得大菩提已。恒作是念。</p> <p>我當安立一切有情諸善根本。若有未悟一切法者。我當開悟。如來如是於諸有情常起大悲。乃至廣說。如契經說。如來晝夜恒於六時觀察世間。云何今言大悲恒轉。此說作用六時相續，恒無間斷故不相違。大慈大悲無瞋不害無癡善根。以為自性。與樂拔苦行相有異。俱有三種有情緣等。慈是無瞋、悲是不害。慈緣無樂，欲與其</p>	

		樂。悲緣有苦，欲拔其苦。無待大悲無差別轉，故名平等。此即法性或緣平等法性為境。由此大悲如前修習圓滿成故。平等性智圓滿成就。	
丙六、隨樂示現平等法性	隨諸眾生所樂示現平等法性圓滿成故。	<p>隨諸有情樂見如來色身差別。如來示現如是色身。如來雖居無戲論位。由平等智增上力故。大圓鏡智相應淨識。現琉璃等微妙色身。令諸有情善根成熟。自心變似如是身根。謂自心外見如來身。如契經言。由諸如來慈善根力有所示現。令天人等自心變異，見如來身。如金色等。</p> <p>又如經言。若所應化無量有情。宜見琉璃末尼寶色。如來即能無礙示現種種琉璃末尼寶色。令彼自心亦如是變。乃至廣說。</p> <p>如是示現一切如來形相平等。如是平等即是法性。是故說名平等法性。謂諸如來隨同所化有情樂見。色身形相即各示現。同處同時同類形相。令彼自心如是變現作利樂事。如諸有情阿賴耶識共相種熟各各變現世界等相。同處相似不相妨礙。此亦如是。如色身相，餘事亦爾。由此示現如前修習圓滿成故。平等性智圓滿成就。</p>	
丙七、一切眾生敬受所說平等法性	一切眾生敬受所說平等法性圓滿成故。	<p>若有如是種類語業。能令有情善根成熟。聞生歡喜得淨信樂。如來便現如是語業令彼得聞。如來雖無戲論分別，由悲願力如是示現。所化有情自勝解力如是變異。謂自心外聞佛音聲。</p> <p>如來所出一切語言稱機宜故。諸人天等皆無違逆故名敬受。若不稱機則不示現故。說諸佛語不唐捐。雖有眾生不順佛語。此是化作或當有益。後必信受。就總為語故言一切敬受所說。</p> <p>如是語言由前道理，諸佛同現故名平等。如是平等即名法性。由此示現如前修習圓滿成故。平等性智圓滿成就。</p>	

<p>丙八、世間寂靜皆同一味平等法性</p>	<p>世間寂靜皆同一味。平等法性圓滿成故。</p>	<p>有漏五蘊說名世間。念念對治二種壞故。即彼息滅名為寂靜。由此、於此而寂靜故。即是聖道及以涅槃依他起性。世間寂靜同歸真如。圓成實性故名一味。</p> <p>又世間者。遍計所執此本性無說名寂靜。如是寂靜所顯真如，無差別故。名為一味。此即名為平等法性。由此一味如前修習圓滿成故。平等性智圓滿成就。</p>	
<p>丙九、苦樂一味平等法性</p>	<p>世間諸法苦樂一味。平等法性圓滿成故。</p>	<p>世間諸法略有八種。一利二衰。三毀四譽。五稱六譏。七苦八樂。得可意事名利。失可意事名衰。不現誹撥名毀。不現讚美名譽。現前讚美名稱。現前誹撥名譏。逼惱身心名苦。適悅身心名樂。如是八種總有二品。四違名苦。四順名樂。生欣感故。</p> <p>或復此中略說。最後苦樂一對。聖者居中恒常一味。得利不高。遇衰不下。如是乃至樂而無愛苦而無恚。</p> <p>如契經言。聖處世間平等一味猶如虛空。凡愚在世計有差別。由彼遠離遍計所執。世間八法於一切處皆同一味。即此說名平等法性。由此一味如前修習圓滿成故。平等性智圓滿成就。</p>	
<p>丙十、修殖無量功德究竟平等法性</p>	<p>修殖無量功德。究竟平等法性圓滿成故。</p>	<p>功德即是菩提分等諸功德法。熏種長養成熟解脫說名修殖。平等性智雖無分別。由佛菩薩智增上力如如意珠。令異身中功德生長成熟解脫。</p> <p>言究竟者。能得三乘般涅槃故。既令解脫。令得世樂不說。自成如是智名平等法性。遠離遍計所執性故。</p> <p>或諸菩薩修殖無量菩提分等殊勝功德。乃至究竟。即此名為平等法性。由此功德如前修習圓滿成故。平等性智圓滿成就。</p>	
<p>甲四、妙觀察智</p>			

(分二科)			
乙一、牒名	復次妙生，妙觀察智者	依十種因。應知。分別妙觀察智十種因者。一建立因。二生起因。三歡喜因。四分別因。五受用因。六趣差別因。七界差別因。八雨大法雨因。九降伏怨敵因。十斷一切疑因。	安立眾生二，諸種無盡果。
乙二、顯示依處 (分十科)			
丙一、建立因相	譬如世界持眾生界。如是如來妙觀察智。任持一切陀羅尼門。三摩地門。無礙辯說諸佛妙法。	<p>此中顯示建立因相。譬如世界持眾生界者。如諸有情自心所變下風輪等諸世界相。能持自心所變眼等諸有情界。如是如來妙觀察智。能持一切陀羅尼門。廣說乃至諸佛妙法。與彼相應，及能引故。陀羅尼者。增上念慧能總任持無量佛法。令不忘失。於一法中持一切法。於一文中持一切文。於一義中持一切義。攝藏無量諸功德故名無盡藏。</p> <p>此陀羅尼略有四種。一法陀羅尼。二義陀羅尼。三呪陀羅尼。四能得菩薩忍陀羅尼。如瑜伽論廣說其相。</p> <p>云何唯於一法等中。普能任持一切法等。謂佛菩薩增上念慧不思議力。自心相分一法相中。現一切法文義亦爾。又能示現無量無盡功德法門。見分自體亦具無邊勝功能故。任持一切令不忘失。如是念慧不思議力。名陀羅尼。</p> <p>三摩地者。謂增上定即健行等諸三摩地。能勝一切世出世間諸三摩地。餘不能勝故名健行。又佛菩薩健士所行故。名健行。唯第十地菩薩及佛得此定故。餘三摩地隨經所說應釋其名。</p> <p>即陀羅尼及三摩地。俱說名門。如空無願無相三門。以能通生無量同類異類德故。</p>	

		<p>無礙辯說即四無礙。法義詞辯。由此四種能為眾生辯說妙法故名辯說。</p> <p>諸佛妙法即是如來力無畏等無量佛法。</p> <p>一切之言一一應說。妙觀察智轉意識得作用寬廣故。能任持一切功德。此智相應第六意識。普與一切功德相應。及能引發諸功德，故說能任持。</p>	
丙二、生起因相	<p>又如世界是諸眾生。頓起一切種種無量相識因緣。</p> <p>如是如來妙觀察智。能為頓起一切所知無礙妙智種種無量相識因緣。</p>	<p>此中顯示生起因相。妙觀察智能作頓起一切所知相識因故。世界即是諸器世間。如器世間能為眾生種種地上無量空中相識生因。如是如來妙觀察智。一時頓於一切境界，猶如虛空能了無礙。能為一切種種世間。無量出世所緣境界相識生因。此義意言。一切如來妙觀察智。能頓了知一切境界。似所知境有眾多相。如彩畫色有種種相。</p> <p>見分智體能為如是相識生因。此能現彼說為生因。非親生因。從種生故。此即緣因，說名因緣。由見起相或體起用。雖無異體，由不一故亦得為因。如從相分生見分等。此亦如是。</p>	
丙三、歡喜因相	<p>又如世界種種可玩。園林池等之所莊嚴甚可愛樂。</p> <p>如是如來妙觀察智種種可玩。波羅蜜多菩提分法十力無畏不共佛法之所莊嚴。甚可愛樂。</p>	<p>此中顯示歡喜因相。如器世間種種可玩。園林池等綺飾間列威光熾盛。令諸有情歡喜愛樂。如是如來妙觀察智種種可玩波羅蜜多菩提分等。綺飾間列威光熾盛。令諸菩薩歡喜愛樂。</p> <p>波羅蜜多略有六種。謂布施等或開為十。更足方便善巧等四。或復開為八萬四千。如經廣說。若別分別其數無量。菩提分法略三十七。廣亦無量。</p> <p>言十力者。謂處非處智力等。如來身中慧根所攝。及具知根。言無畏者。謂四無畏五根所攝。及具知根即信等五。不共佛法有十八種。如經廣說。如是功德多分此智所攝。相應及能引發。是故一切莊嚴此智。</p>	

<p>丙四、分別因相</p>	<p>又如世界洲渚日月四天王天三十三天。及夜摩天覩史多天樂變化天他化自在天梵身天等。妙飾間列。如是如來妙觀察智。世及出世衰盛因果。聲聞獨覺菩薩圓證無餘。觀察妙飾間列。</p>	<p>此中顯示分別因相。如器世間無量洲等。妙飾間列不相雜亂。洲謂四大洲。則瞻部洲等。渚謂八小渚。則遮末囉等。略舉日月攝諸星宿。四天王天。謂妙高山第四層級四面各住。三十三天。謂此山頂四面各有八大天王帝釋居中故有此數。夜摩天者。謂此天中隨時受樂故名時分。覩史多天後身菩薩於中教化。多修喜足故名喜足。樂變化天。樂自變化作諸樂具。以自娛樂。他化自在。樂令他化作諸樂具。顯己自在。梵身天者。離欲寂靜故。名為梵。身者眾也。等者等取此上諸天。如是如來妙觀察智。普能觀察世及出世衰盛因果。三乘圓證妙飾間列。不相雜亂。惡趣因果名世間衰。善趣因果名世間盛。又世間壞及世間成。如其次第名為衰盛。又損減名衰。增長名盛。二乘因果名出世衰。大乘因果名出世盛。又退名衰進名為盛。言圓證者。即是果位。前三乘名顯其因位。又圓證者。唯說佛果。妙觀察智觀此諸法法相異故。智如其境。行相不雜分明顯現。是故說名妙飾間列。</p>	
<p>丙五、受用因相</p>	<p>又如世界為諸眾生廣大受用。如是如來妙觀察智。示現一切諸佛眾會兩大法雨。為令眾生受大法樂。</p>	<p>(卷六) 此中顯示受用因相。如器世間隨有情業增上力故。阿賴耶識共相種子。變生種種共相資具。為令有情廣大受用。如是如來妙觀察智，助平等智為增上緣，擊發鏡智相應淨識。現受用身，種種眾會，威德熾盛，兩大法雨，為令地上諸大菩薩受大法樂。亦助如來成所作智為增上緣，擊發鏡智相應淨識，現變化身，種種眾會威德熾盛兩正法雨，為令地前所化有情受用法樂。</p>	
<p>丙六、趣差別因相</p>	<p>如世界中五趣可得。所謂地獄餓鬼傍生人趣天趣。</p>	<p>此中顯示趣差別因相。如世界中隨有情業增上力故，阿賴耶識不共相種，變生種種五趣因果差別可得。</p>	

	<p>如是如來觀察智上。無邊因果五趣差別具足顯現。</p>	<p>如是如來妙觀察智。五趣因果為境界故。似其五趣因果二相差別顯現。 非生五趣諸阿素洛種類不定。或天或鬼。或復傍生故。不別說。 五趣因者。謂中有身以與五趣為方便故。趣是所趣。中有能趣故。非趣攝。就生類別，建立四生。是故中有亦生所攝。 有義中有趣方便故。說在趣中。此言因者，業煩惱等。果即五趣。</p>	
<p>丙七、界差別因相</p>	<p>如世界中欲色無色諸界可得。如是如來觀察智上。無邊因果三界差別。具足顯現。</p>	<p>此中顯示界差別因相。如世界中隨有情業增上力故。阿賴耶識共不共相種子。變生三界因果差別可得。此中世界通情非情。謂有情世界及器世界。若不爾者。不應於中有無色界。以彼唯有定所生色。無業生色，無方處故。於世界中，隨其所應建立三界。謂器世界中但有欲色情非情界。有情界中具有三種。唯有情界以器世界通持有情及非情界。有情世界。唯能任持有情界故。 如是如來妙觀察智三界因果為境界故。似其三界因果二相差別顯現。非生三界因果。同前二種分別。 此中意說。妙觀察智普能觀察一切境故。遍似一切諸界趣生。煩惱業等所感。諸行成熟所攝心心法等因果相現。謂諸如來大圓鏡智增上所生妙觀察智。雖無所取能取執著。遠離一切煩惱所知二垢障故。觀察一切因果等事。及能說故。 如淨圓鏡現眾影像，一切境相皆現其中，然無鏡智無差別過。大圓鏡智以於一切皆不愚故。雖能顯現一切影像任運轉故，而無分別。 此智能現一切境相亦有分別。若無分別，則不能觀因果等事，及為眾會說法斷疑。 此文定證，無漏心等亦有相分。如來智上五趣三界無邊因果具足現故。</p>	

		<p>有說。如來智明淨故。一切境相雖現其中。而此境相非智所變。不清淨故。但是眾生心等所變諸法影像。此不應理。如是影像，若是眾生心等所變。云何在佛智上顯現？不可他因生他心相，違正理故。如餘心相。此亦應爾。</p> <p>然此境相，如來無漏心所變現。如明鏡中糞穢影像。雖似不淨，實非不淨。心及心法緣境法爾，</p> <p>若緣他境，非如鉗燈，無動作故。但如明鏡性本淨故，變似境相而能緣慮。</p> <p>若諸境相非心上現。彼雖有力生心心所。如五根等不名所緣。如餘處說。無分別智亦定爾耶？所緣真如不離智體不可定爾。後得俗智雖不離真，有分別故，不證真體。但自變作真相而緣，故不可難。</p> <p>如諸異生心緣無漏心上所有無漏境相。雖似無漏，實是有漏，此亦應爾。唯識道理決定如是。心所變相，雖相似有而實無體。若不爾者，應有色等。如心心法不成唯識。若彼實有，但不離識。名唯識者，心及心法亦不離彼色等諸相，應名唯境，便成大過。</p>	
<p>丙八、兩大法 兩因相</p>	<p>如世界中蘇迷盧等。大寶山王顯現可得。如是如來觀察智上。諸佛菩薩威神所引。廣大甚深教法可得。</p>	<p>此中顯示兩大法兩因相。如器世間由諸眾生業增上力起諸寶山。如是如來妙觀察智。由諸有情感正法業增上力故。起佛菩薩威神所引深大教法。此教開示諸佛菩薩自在威神。亦能引發彼威神力。是故說名諸佛菩薩威神所引。</p> <p>此說如來妙觀察智能發鏡智相應識上教法影像。或自能現教法影像。由此為緣，善根成熟。所化有情自心變現。</p>	
<p>丙九、降伏怨 敵因相</p>	<p>如世界中廣大甚深不可傾動大海可得。如是如來觀察智上。一切天魔外道異</p>	<p>此中顯示降伏怨敵因相。如器世間由諸眾生業增上力起諸大海。不可傾動。</p> <p>如是如來妙觀察智。由諸有情感正法業增上力故。起法界教不可傾動。</p>	

	<p>論所不傾動。甚深法界教法可得。</p>	<p>法界則是空無相理。說法界理名法界教。諸外道等皆依諸見法界空理。對治諸見離諸見趣。是故空教彼不能測。不能傾動前威神教。威神高廣故喻寶山。此法界教，法界甚深故喻大海。妙觀察智是能顯照一切境因故。能起說一切法教。略說勝者。是故契經說。佛世尊名大智日。普能照了一切法故。</p>	
<p>丙十、斷一切疑因相</p>	<p>又如世界大小輪山之所圍繞。如是如來妙觀察智不愚一切自相共相之所圍繞。</p>	<p>此中顯示斷一切疑因相。如器世界一妙高山七大金山八大海水四大洲等。總於其外有小輪山周匝圍繞。如是為一積數至千。復總於外有次輪山周匝圍繞。名小千界。如是為一復數至千。更總於外有次輪山周匝圍繞。名中千界。如是為一復數至千。總於其外有大輪山周匝圍繞。有大風輪總持其下名一三千大千世界。如是名為大小輪山之所圍繞。</p> <p>如是如來妙觀察智。遍知一切自相共相。能斷世間一切疑惑自共相愚。是疑惑因知自共相。無此愚故。自無疑惑能斷他疑。大圓鏡智永離二障不愚一切自相共相，能生此智。攝護此智，故名圍繞。鏡智雖能知一切法自相共相。無分別故。不能為他說法斷疑。此智能知有分別故。能為一切說法斷疑。</p> <p>又此智體能知諸法自相共相。二種行相之所圍繞。自相行相如小輪山。共相行相如大輪山。</p> <p>鏡智能持如風持下。</p> <p>如來淨智現量所攝。云何能知諸法共相。若共相境，現量所知。云何二量依二相立。</p> <p>有義。二量在散心位依二相立。不說定位。若在定心緣一切相。皆現量攝。</p>	

		<p>有義。定心唯緣自相。然由共相方便所引。緣諸共相。所顯理者。就方便說名知共相。不如是者名知自相。由此道理。或說真如名空無我諸法共相。</p> <p>或說真如二空所顯非是共相。如實義者。彼《因明論》立自共相。與此少異。彼說一切法上實義。皆名自相。以諸法上自相共相。各附己體不共他故。</p> <p>若分別心立一種類能詮所詮。通在諸法如縷貫花。名為共相。此要散心分別假立是比量境。</p> <p>一切定心離此分別。皆名現量。雖緣諸法若無常等。亦一一法各別有故。名為自相。</p> <p>真如雖是共相所顯。以是諸法自實性故。自有相故。亦非共相。不可以其與一切法不一不異即名共相；自相亦與一切共相不一異故。是故彼論說諸法上所有實義。皆名自相。</p> <p>此經不爾故無相違。</p>	
甲五、成所作智 (分三科)			
乙一、牒名	復次妙生成所作智者		
乙二、總釋作用		<p>應知成立如來化身。此復三種。一者身化。二者語化。三者意化。第一身化復有三種。一現神通化。二現受生化。三現業果化。第二語化亦有三種。一慶慰語化。二方便語化。三辯揚語化。第三意化復有四種。一決擇意化。二造作意化。三發起意化。四受領意化。成所作智能起如是三業化用。此化三業即是化身。應知此中以用顯體。非此三業即是智體，但是智上所現相分。</p>	<p>身語及心化，善巧方便業。</p>

		<p>成所作智增上緣力擊發鏡智相應淨識。令現如是三業化用。自亦能現。當知四智一一能起一切作用。就強多分。說平等智起受用身。成所作智起變化身。妙觀察智觀察一切自相共相。陀羅尼門三摩地等。大圓鏡智能現一切諸法影像。如一一根取一切境非無強用。此亦如是。此中經文定證。三業心心法等皆有變化。如來智上現此鹿相心心法等一切功德。令諸下位能現了知。若不爾者。二乘異生云何能知。如來所有心心法等功德差別。云何如來久已成佛。復能現作具貪瞋等種種化身。餘經亦說。化無量類皆令有心。又說化身亦名有心。亦名無心。有依他心、無自依心故。謂化心等依實心現。但實心上相分似有緣慮等用。如鏡中火，無別自體。隨眾緣生。如餘心等。餘處雖說無化心等以無實用。如實心等變化色等有實作用。如實色等故偏說有。由化心等鹿相顯現易了知故。乃至猿猴知如來心。若佛實心，諸大菩薩亦不能了。</p>	
乙三、別釋三業作用(分三科)			
丙一、身化(分三科)			
丁一、現神通化	<p>如諸眾生勤勵身業。由是眾生趣求種種徇利務農勤王等事。如是如來成所作</p>	<p>此中顯示現神通化化身業相。令心勇悍故名勤勵。於善性中兼取精進餘但作意。由此發起勤勵身業。就因為名。由此身業世間有情作三正事。等者等取其餘雜事。</p>	

	<p>智勤身化業。由是如來示現種種工巧等處。摧伏諸伎、傲慢眾生。以是善巧方便力故。引諸眾生令入聖教、成熟、解脫。</p>	<p>成所作智精進相應起化身業。由此化業為菩薩時。示現種種陶師等類工巧等處。此是智上身業相現。為欲摧伏伎術傲慢故。現斯事善巧方便。即是悲慧平等運道，先現神通。初令生信故名引生令入聖教。如現神通度迦葉等。</p> <p>次令調順有所堪能故名成熟。引令長養諸善根故。</p> <p>後令解脫三界惡趣有性無性。如其次第故名解脫。</p> <p>由教化力。有種性者令生聖道解脫三界。無種性者。令修世善常生善趣。念彼善根為說正法。令脫三界。放光息苦，安立善趣。</p> <p>又令彼生聞、思、修慧。次第三句。</p> <p>又令彼生順解脫分、順決擇分、及生聖道。次第三句。</p> <p>又令彼入見道、修道、及無學道。次第三句。</p> <p>如是等釋應隨相說。後亦如是。</p>	
<p>丁二、現受生化</p>	<p>又如眾生受用身業。由是眾生受用種種色等境界。如是如來成所作智受身化業。由是如來往諸眾生種種生處。示同類生而居尊位。由其示現同類生故。攝伏一切異類眾生。以是善巧方便力故。引諸眾生令入聖教成熟解脫。</p>	<p>此中顯示現受生化化身業相。世間有情於諸生處。諸根領納色等境界故。名受用身。有運轉故名身業。成所作智一切生處。同時現生受用境界。謂現化身於天人中一切生處。示同類生。居剎帝利婆羅門種。伏諸下類，令得利樂。此亦智上身業相現。或擊鏡智。或自顯現，餘例應爾。</p>	
<p>丁三、現業果化</p>	<p>又如眾生領受身業。由是眾生領受所作善惡業果。</p>	<p>此中顯示現業果化化身業相。身即是業故名身業。先業果故果說因名。或身領受先業果時。有運轉用故名身業。由此身業領受先業愛非愛果。</p>	

	<p>如是如來成所作智領身化業。由是如來示現領受本事本生難修諸行。以是善巧方便力故。引諸眾生令入聖教。成熟解脫。</p>	<p>成所作智現似化身領受化業。由此業故示受一切。本事本生難修諸行。先世相應所有餘事。名為本事。先世所受生類差別名為本生。如毘濕飯怛囉等一切本生事。依此本生。先所修行種種苦行。名難修行。或於今世依變化身。先修苦行後捨彼行。修處中行方得菩提。名難修行。謂諸眾生計修苦行止惡起善方得菩提。為化彼故，先示同彼。修諸苦行。為顯非但持戒得淨。要由定慧方得淨故。現捨苦行修處中行方得菩提。有契經說。如來先世迦葉佛時作是罵言。何處沙門剃鬚髮者。有大菩提無上菩提極難得故。由彼惡業今受如是難行苦果。此言亦是為止惡行現化所作。若不爾者。何有繫屬一生菩薩。已曾親事無量如來殖諸善本。性憶宿命更起如是重語惡行。當知此言為欲化度。宜聞此言而得度者。令於佛所離此言故。</p>	
<p>丙二、語化(分三科)</p>			
<p>丁一、慶慰語化</p>	<p>又如眾生慶慰語業。由是眾生展轉談論遞相慶慰。如是如來成所作智慶語化業。由是如來宣暢種種隨所樂法。文義巧妙。小智眾生初聞尚信。以是善巧</p>	<p>此中顯示慶慰語。化化語業相。慶慰即是喜悅差別語，能生彼故名慶慰。聞此語言。展轉發生大歡喜故。謂諸有情由發語心增上力故。各別識上語業相現為增上緣。令餘識變似語業相。各謂聞他語言生喜。成所作智化作語業。應知亦爾。自現妙音令他心變。謂聞佛語生歡喜故。隨所樂法者。隨彼因力所應樂聞。人天三乘諸差別法。文巧妙者。字句顯美令樂聞故。義巧妙者。理趣分明易解了故。小智眾生初聞尚信者。謂佛言音具六十德。諸凡愚慧暫時得聞尚生信解。何況其餘聰慧者。</p>	

	方便力故。引諸眾生令入聖教成熟解脫。	慧成所作智名慶慰者。能現化語宣說一切巧妙文義。生諸有情歡喜心故。亦能加被善現等輩。以佛言音宣說甚深難測量法。如是此智，能加被他。一切論者。一切色類乃至虛空。亦能發起化語說法。當知此事不可思議。	
丁二、方便語化	又如眾生方便語業。由是眾生展轉指授務專所作。毀惡讚善更相召命。如是如來成所作智。所起方便語變化業。由是如來立正學處。毀諸放逸、讚不放逸。又復建立隨信行人隨法行等。以是善巧方便力故。引諸眾生令入聖教成熟解脫。	此中顯示方便語化化語業相。如諸世間方便語業更相教示。諸所應作不應作事。利益親友。放逸眾生加行起作故。名方便。如是如來由大悲故。為諸有情安立學處。令伏諸惡修世間善。安立聖道分位差別。令人正道出離三界。成所作智能發化語。成辦斯事。調息諸惡發起諸善是此語用。	
丁三、辯揚語化	又如眾生辯揚語業。由是眾生展轉開示所不了義。宣諷諸論。如是如來成所作智辯語化業。由是如來斷諸眾生無量疑惑。以是善巧方便力故。引諸眾生令入聖教成熟解脫。	此中顯示辯揚語化化語業相。成所作智隨諸眾生意樂差別，現化語業。說種種義斷諸疑惑。謂發一音表一切義。令諸有情隨類獲益。如契經言。佛以一音演說諸法。眾生隨類各得開解。或有怖畏。或有歡喜。或生厭離。或復斷疑。此是如來本願所引不思議力所發化語。一音能斷一切眾疑。若作化身亦令眾生一質異見利樂事成。	

丙三、意化(分四科)			
丁一、決擇意化	<p>又如眾生決擇意業。由是眾生決擇可作及不可作。如是如來成所作智。決意化業。由是如來決擇眾生八萬四千心行差別。以是善巧方便力故。引諸眾生令入聖教成熟解脫。</p>	<p>此中顯示決擇意化化意業相。成所作智相應意業能起化故。名化意業。此能決擇所化眾生八萬四千心行差別。或復此智相分中現變化意業似。能決擇眾生八萬四千心行。令彼了知得勝義利。</p> <p>云何八萬四千心行。謂諸有情八萬四千諸垢塵勞心行差別。此能障礙八萬四千波羅蜜多。陀羅尼門三摩地等。如賢劫經廣說其相。所謂最初修習行法波羅蜜多。乃至最後分布佛體波羅蜜多。三百五十一皆具六到彼岸。如是總有二千一百對治。貪、瞋、癡、及等分有情心行八千四百。除四大種及六無義所生過失。十轉合數八萬四千。修習此故復得成就八萬四千陀羅尼門三摩地等。此猶略說廣則無量。</p>	
丁二、造作意化	<p>又如眾生造作意業。由是眾生造作種種諸所起業。如是如來成所作智造意化業。由是如來觀諸眾生所行之行與不行。若得若失為令取捨。造作對治。以是善巧方便力故。引諸眾生令入聖教成熟解脫。</p>	<p>此中顯示造作意化化意業相。隨所觀察一切有情所行之行。若諸惡行不行有得。行即有失。若諸善行行即有得。不行有失。如是觀察為欲令彼取得捨失。於德造作，任持對治。於失造作，遠離對治。成所作智相應意業能起化故。名化意業。雖諸如來於一切事無有功用。而令眾生心等變現似有造作。故名造作。</p> <p>或復此智相分中。現變化意業似能觀察一切有情諸行得失。令彼了知得勝義利。</p>	
丁三、發起意化	<p>又如眾生發起意業。由是眾生發起諸業。</p>	<p>此中顯示發起意化化意業相。成所作智相應意業。能發身語二種業故。就用說名發起意業。或此意業由智發起。是故說名發起意業。</p>	

	<p>如是如來成所作智發意化業，由是如來為欲宣說彼對治故。顯彼所樂名句字身。以是善巧方便力故。引諸眾生令入聖教成熟解脫。</p>	<p>能起化故。或智相分現似彼故。此化意業為欲宣說彼對治者。為說有情諸行對治。此所說法名句字身以為自性。是故顯示名句字身。如來隨彼有情所樂，說名身等。令起愛樂發生對治。是則如來成所作智相分中。現變化意業，發名身等。宣說有情諸行對治。由此力故。令諸有情自心變似佛所說法，深生愛樂發起對治。是故說名發起意業。</p>	
<p>丁四、受領意化</p>	<p>又如眾生受領意業。由是眾生受領苦樂。如是如來成所作智受意化業。由是如來於定不定反問置記為記別故隨其所應，受領去來現在等義。以是善巧方便力故。引諸眾生令入聖教成熟解脫。</p>	<p>此中顯示受領意化化意業相。受相應思，能動其心令受苦樂。是故說名受領意業。</p> <p>成所作智受相應思能起化故。名化意業；成相分中現化意業。名化意業。於四記問為記別故。隨其所應如實了知一切問已。領三世等無量法義如實了知。一一自體如實知已。隨其所應一一記別，無有顛倒。言四記者。一一向記。二分別記。三反問記。四默置記。</p> <p>一向記者如有問言。一切生者決定滅耶。佛法僧寶良福田耶。如是等問應一向記。此義決定。</p> <p>分別記者。如有問言。一切滅者定更生耶。佛法僧寶唯一耶。如是等問應分別記。此義不定。</p> <p>反問記者。如有問言。菩薩十地為上為下。佛法僧寶為勝為劣。如是等問應反問記。汝望何問。</p> <p>默置記者。如有問言。實有性我為善為惡。石女兒色為黑為白。如是等問應默置記。不應記故。長戲論故。</p>	